



Mónica González Pavón, secretària generau deth Conselh Generau d'Aran,

CERTIFIQUI:

Que segontes Decret de Sindicatura num. 0578/2025, de 31 d'octubre, s'a adoptat era següenta resolucion, era còpia literau dera quau ditz:

"Maria Vergés Pérez, sindica deth Conselh Generau d'Aran, en tot hèr usatge des facultats que me conferís er article 29.4 dera Lei 1/2015, de 5 de hereuèr, deth Regim Especiau d'Aran,

EXPOSICION DE MOTIUS E MARC NORMATIU

Vist qu'en Decret de Sindicatura num. 065 de 25 d'abriu de 2001, damb qué s'aprovaue era normativa reguladora des certificacions qu'expedie eth Conselh Generau d'Aran sus es coneishements d'aranés, qu'aprovèc en data 25 d'abriu de 2001 e se publiquèc en BOP de Lhèida num. 60 de 19 de mai de 2001 e en DOGC num. 3398 de 29 de mai de 2001, se hège referéncia ara Lei 16/1990, de 13 de junhsèga, sus eth regim especiau dera Val d'Aran, en sòn article 2 titulat "Er aranés varietat dera lengua occitana e pròpia d'Aran, ei oficiau ena Val d'Aran" e, concrètament, en sòn article 20.2 que ditz: "Eth Conselh Generau a competéncia plea en tot aquerò que hè referéncia ath foment e ar ensenhament der aranés e dera sua cultura cossent damb es normes de caractèr generau vigentes en tota Catalonha en camp dera politica lingüistica e educativa".

Se hège referéncia tanben ath Decret 212/1999, de 27 de junhsèga, de transferéncia de competéncias e servicis dera Generalitat de Catalunya ath Conselh Generau d'Aran en matèria d'ensenhament qu'establís qu'en aquerò que hè ara formacion permanenta deth professorat en lengua e cultura aranesa, se traspasse era organizacion de còrsi de normalizacion lingüistica entà arténher era capacitacion que permete ensenhar er aranés. E tanben ath Decret 244/1991, de 28 d'octubre, sus eth coneishement des dues lengües oficiaus entara provision de lòcs de trebalh docent des centres publics d'ensenhament non universitari en Catalonha, depenents deth Departament d'Ensenhament que mènque, ena disposicion addicionau tresau, que "entara provision de lòcs de trebalh en territòri dera Val d'Aran, calerà acreditar tanben eth coneishement orau e escrit der aranés, cossent damb era normativa vigenta."

Se nomenaue tanben era Lei 1/1998, de 7 de gèr, de politica lingüistica, que daue a entèner qu'eth personau ath servici des administracions publiques de Catalonha ena Val d'Aran, auie d'auer eth coneishement adequat e sufisent dera lengua aranesa e ena sua disposicion finau prumèra apartat 2au ditz que "Se modifique er article 294.2 dera Lei 8/1987, deth 15 d'abriu, municipau e de regim locau de Catalonha, que demore redactat dera manèra següenta: "Article 294.2. Cossent damb es sues aufèrtes d'aucupacion publica, es entitats locals an de seleccionar eth personau per miei de convocatòria publica e des sistèmes de concors, oposicion e concors oposicion liures, enes quaus an de demorar garantits es principis d'igualtat, de merit, de capacitat e de publicitat. En procès de seleccion, s'a d'acreditar eth coneishement deth catalan e, enes ens locals dera Val d'Aran, tanben er aranés, autant ena expression orau, coma ena escrita, en grad adequat as foncions pròpies des places de qué se tracte."

Vist que se metie de manifest qu'eth Convèni entre eth Departament d'Ensenhament e eth Conselh Generau d'Aran, d'1 de seteme de 1999, entara coordinacion des competéncias



transferides ath Conselh en matèria d'ensenhament contemplaue qu' "es còrs de normalizacion lingüística entà obtier era capacitacion en aranés an de continuar acreditant eth coneishement dera lengua aranesa, a efèctes dera provision de lòcs de trabalh en territòri dera Val d'Aran, previst ena disposicion addicionau tresau deth Decret 244/1991, de 28 d'octobre," e tanben qu' "Es activitats de formacion permanenta deth professorat en lengua e cultura aranesa auràn es madeishi efèctes administratius (reconeishement d'estadis de promocion docenta, oposicions e concorsi) qu'es activitats includides en Plan de Formacion Permanenta deth Departament d'Ensenhament."

Vist que deuant dera situacion juridica, deuant deth hèt qu'enes darrèrs ans s'an impartit diuèrsi nivèus d'ensenhament der aranés, ena escòla, ena formacion deth professorat, ena societat en generau e pr'amor que cau responses clares as qüestions relatives ara formacion en aranés, eth Conselh Generau d'Aran creiguesc oportun desplegar ua reglamentacion que regulèsse es diuèrsi nivèus d'aprendissatge d'aranés e era possibla equiparacion entre eri. Tanben aguesc en compde era creishenta implantacion d'Euròpa e era existència de boni coneishedors der aranés, o der occitan, que l'an estudiat en universitats e institucions d'Occitània, Catalonha e Euròpa en generau e que volien accedir a auer es certificacions deth Conselh Generau d'Aran.

Finaument, en benefici d'ua major simplificacion administrativa, se considerèc que calie prescindir dera Junta Permanenta d'Aranés. Per tot açò, en exercici des facultats deth sindic, e a propòsta dera alavetz nomentada Oficina de Foment e Ensenhament der Aranés deth Conselh Generau d'Aran, prealabla aprobacion unanima en Plen deth Conselh Generau d'Aran, un viatge consultats eth Departament de Cultura e eth Departament d'Ensenhament dera Generalitat de Catalunya, era Inspeccion Tecnica d'Ensenhament, es representants des sectors professionaus, universitaris e sociaus implicats, e es servicis juridics adequats se resolvec era aprobacion deth nomentat reglament.

Vist qu'en preambul der acòrd deth Plen deth Conselh Generau d'Aran de 28 d'abriu de 2014, dera modificacion deth decret regulador des certificacions qu'expedís eth Conselh Generau d'Aran sus es coneishements d'aranés se hè referència ar article 6.5 der Estatut d'Autonomia de Catalunya deth 2006 que ditz que "era lengua occitana, denominada aranés en Aran, ei era lengua pròpria d'aguest territòri e ei oficiau en Catalonha" e s'afirme qu'eth desenvolopament d'aguest oficialitat s'a amiat a tèrme a trauès dera Lei 35/2010, d'1 d'octobre, der Occitan, Aranés en Aran qu'a significat ua grana evolucion en encastre der aranés.

Dat qu'era Lei 35/2010, d'1 d'octobre, der occitan, aranés en Aran, ditz en article 5.5 que "enes procèssi de seleccion des foncionaris e deth personau laborau deth Conselh Generau d'Aran, des entitats locals d'Aran e des organismes que ne depenen, s'a d'acreditar era coneishença der aranés, en grad adequat as foncions pròpies des places corresponentes, cossent damb era norma en vigor" e vist qu'er apartat 6 establís que "es convocatòries dera Administracion dera Generalitat e des entitats locals de dehòra d'Aran que preveiguen era provision de places destinades en Aran an d'includir coma condicion era coneishença der aranés enes casi en qué sigue procedent entà hèr efectiu aquerò que dispòse er apartat 4. Ena provision des autas places destinades en Aran, era coneishença der aranés s'a d'avalorar coma merit". Dat qu'er article 6.6 d'aguesta madeisha norma dispause que "en procès de seleccion entara provision de lòcs de trabalh dera Administracion dera Generalitat e des entitats locals de Catalonha, era coneishença dera lengua que regule aguesta lei pòt èster avalorada coma un merit, enes tèrmes que se determinen per reglament. Era coneishença orau e escrita dera lengua pròpria d'Aran pòt èster tanben ua condicion entara provision de lòcs de trabalh dera Administracion



Conselh Generau d'Aran

dera Generalitat dehòra d'Aran se, cossent damb era relacion de lòcs de trabalh, les corresponen foncions qu'ac justifiquen, sustot es restacades damb era atencion orau o escrita ara ciutadanetat, er ensenhament, es relacions institucionaus, es d'assessorament lingüistic o es de projeccion exteriora e foment der usatge".

Vistes aguestes modificacions, eth transcors deth temps e era adaptacion ara naua situacion socia e as demandes des ciutadans, cossent damb açò expausat e vista era propòsta der Airau de Politica Lingüistica deth Conselh Generau d'Aran s'acordèc aprovar era modificacion deth decret de 2001 entà aprovar en plen eth Decret Regulador des certificacions qu'expedís eth Conselh Generau d'Aran sus es Coneishements d'Aranés de 2014, publicat en BOP dera província de Lhèida eth 7 de junhsèga de 2014 e publicat e DOGC eth 10 de junhsèga de 2014.

Damb era aprobacion dera Lei 1/2015, de 5 de heruèr, deth regim especiau dera Val d'Aran qu'establís un marc competenciau mès ampli entà Aran e place er aranés en un lòc a on s'aishamplissen es possibilitats d'usatge e visibilizacion, er Airau de Lengua deth Departament de Cultura e Lengua deth Conselh Generau d'Aran propòse era aprobacion d'un nau decret regulador.

Vist que demore acreditat eth besonh de procedir a ua modificacion substancial deth Reglament entà garantir era sua adaptacion as cambis normatius, sociaus e culturaus; de manèra que, se protegisque e dòte de mès seguretat juridica a toti es "aranesoparlants".

Vist qu'er article 130.1 dera Lei 39/2015, d'1 d'octobre, deth Procediment Administratiu Comun des Administracions Publiques, establís que *"las Administraciones Públicas revisarán periódicamente su normativa vigente para adaptarla a los principios de buena regulación y para comprobar la medida en que las normas en vigor han conseguido los objetivos previstos y si estaba justificado y correctamente cuantificado el coste y las cargas impuestas en ellas"*.

Vist qu'era aprobacion dera Lei 39/2015, d'1 d'octobre, deth Procediment Administratiu Comun des Administracions Publiques, a supausat ua modulacion deth procediment administratiu, especiaument en aquerò que hè ara tramitacion electronica, as drets des interessats e ath regim d'autorizacions administratives, motiu peth quau cau adaptar era ordenança vigenta ad aquest regim juridic en vigor.

Vistes es prepauses der airau de lengua deth Conselh Generau d'Aran.

Cossent damb tot aquerò expausat e aquerò previst enes articles 8.a) e 178 e següents deth Decret Legislatiu 2/2003, de 28 d'abriu, peth quau s'apròve eth Tèxte Rehonut dera Lei Municipau e de Regim Locau de Catalunya, e cossent damb es previsions der article 49 e següents dera Lei 7/1985, de 2 d'abriu, Reguladora des Bases deth Regim Locau, 60 e següents deth Decret 179/1995, de 13 de junh, peth quau s'apròve eth Reglament d'Òbres, Activitats e Servicis des Ens Locaus, , 127 e ss dera Lei 39/2015, d'1 d'octobre, deth Procediment Administratiu Comun des Administracions Publiques, e 10.1.a) e 10.1.c) dera Lei 19/2014, deth 29 de deseme, de Transparéncia, Accès ara Informacion Publica e Bon Govèrn, e dat qu'era aprobacion d'aquest acòrd ei competéncia deth Plen deth Conselh Generau d'Aran,

Cossent damb tot aquerò expausat,

È RESOLVUT:



PRUMÈR.- Instar e impulsar er expedient entà procedir ara aprobacion dera *Ordenança reguladora des certificacions qu'expedís eth Conselh Generau d'Aran sus es coneishements d'aranés e es sues equivaléncias*, en sentit de sistematizar, simplificar, armonizar, ordenar e garantir era seguretat juridica en aguesta matèria.

DUSAU.- Ordenar era realizacion d'ua consulta publica, per un periòde de 15 dies obrants, damb caractèr prealable ara elaboracion deth projècte de regulacion dera *Ordenança reguladora des certificacions qu'expedís eth Conselh Generau d'Aran sus es coneishements d'aranés e es sues equivaléncias*, damb er objectiu de recuèlher era opinion des ciutadans/es e organizacions mès significatives potenciauments afectades pera futura regulacion, en compliment d'aquero que dispause er article 133 dera Lei 39/2015, de Procediment Administratiu Comun des Administracions Publiques.

Era consulta s'amiarà a tèrme mejançant era sedença electronica deth Conselh Generau d'Aran en relacion damb:

- a) Problèmes que se pretenen solucionar damb era iniciativa.
- b) Besonh e oportunitat dera sua aprobacion
- c) Objectius deth reglament
- d) Possibles solucions alternatives reguladores e non reguladores.

TRESAU.- Notificar aquest acòrd as personas interessades.

QUATAU.- Contra aquest acte de tramit, que non acabe era via administrativa, non procedís interpausar cap de tipe de recors, sense prejudici dera possibilitat d'interpausar posteriorament es recorsi corresponenti contra er acòrd d'aprobacion definitiva."

E, entà qu'atau cònte ar efècte oportun, signi aquest certificat d'orde e damb eth visteplatz dera Sindica.

Vielha, *signat electronicament*

Vist e platz
Era Sindica

Maria Vergés Pérez